

Sebutir Peluru Penjajah

Masa lalu
sebelum mengenal merdeka
ketika aku masih remaja
mengusung senjata di tangan
memerah keringat di hutan
bertemankan bunyi peluru dan dentuman
tiba-tiba
sebutir peluru penjajah
hinggap tepat menerjah
di bahu kiri lalu rebah
mengalirlah darah pekat merah
jatuh membajai tanah tumpah
bumi yang belum merdeka
namun
aku masih mampu mengukir
sebuah senyuman bangga di bibir
dek kerna peluru itu
hanya mampu menembusi bahu
bukan jiwa juga minda

Masa telah berlalu
di bumi yang tidak lagi dijajah
di malam pesta kemerdekaan
melihat gelagat remaja berpasangan
sebatang rokok terkepit rapat di celah
dua bibir yang tidak lagi merah
mengusung megah gajet di tangan
bertemankan lagu-lagu yang digubah
ala-ala penjajah
menari berpesta ria berpelukan
meraikan sebuah kebebasan

Melihat semua telatah itu
aku tidak lagi mampu mengukir
walau sebaris senyuman di bibir
sebutir peluru penjajah itu
tidak lagi hinggap di bahu
tetapi di jiwa dan juga minda
anak-anak remaja kita



Nukilan:
Dr. Airul Sharizli Abdullah
Fakulti Teknologi Kejuruteraan Elektrik dan Elektronik (FTKEE)
Universiti Malaysia Pahang Al-Sultan Abdullah (UMPSA)

-
- 22 views

[View PDF](#)